

OCA 1982 – 2015

Un organisacion cu a vibra e bida equino internacional

Na comienso di decada '80 tabata reina un deseo entre caballistanan pa un cambio den e mundo equino. Caballistanan tabata den busca di un organisacion dinamico cu por a crea mas actividad y traha riba un base mas amplio pa e desaroyo di cabainan di paso den su sentido mas amplio. E organisacion existente no tabata activo y esnan den e directiva tabata den desacuerdo riba e rumbo cu e asociacion mester a tuma.

Den di dos mitar di aña 1982 un grupo di caballista a tuma accion pa trese un cambio y nan a desea pa hasi esey mediante un federacion nobo cu por yena e bashi cu nan tabata sinti. E grupo aki a acerca Tom Pietersz pa lidera e cambio. E prome movimiento tabata pa formalisa e deseonan aki mediante un reunion general di caballistanan y tende di nan ki ta nan deseo. E prome reunion, cu a tuma lugar na Rancho "El Paso" a conta cu un gran cantidad di caballista y e reunion a yega na diferente decision concreto. Central tabata e consenso unanime pa lanta un federacion nobo y a elih un grupo di trabao cu lo percura pa esey bira un realidad. Aki ta e momento cu oficialmente "Organizacion Caballista Arubano" a mira luz. Tom Pietersz a keda elih como e prome president, cu ta e puesto cu ela ocupa pa e siguiente 10 aña. E team di miembronan fundador di e prome directiva a keda completa pa Enid Arends, Nelson Richardson, Oscar Werleman, Lucho Claro, Sonny Salas, q.e.p.d. y Leonard Peterson.

E prome competencia organisa pa OCA a tuma lugar na April 1983. OCA a hunga un rol visionario y conciliador den e mundo di cabai, tresiendo e caballistanan hunto pa sinti nan mes na cas cu un variacion di actividad, cu tabata varia di cabalgata, competencia y hasta careda di cabai. OCA a sirbi tambe di catalisador. Asina por menciona cu e representantenan di e directiva a viaha pa Corsow pa re-activa e federacion ayanan y entusiasma caballistanan pa fomenta e deporte. A pinta nan un epoca nobo y briyante, caminda entre otro lo bai organisa competencia entre e dos islanan y lo fomenta reproduccion y cria door di dek yewanan cu reproductornan nobo pa drecha e raza.

Una bez cu Corsow tabata den e drive y e prome competencianan interinsular a bira un exito sumamente grandi, bista di OCA a cai riba Coro y Punto Fijo cu e intencion pa forma un triangulo hunto cu Corsow y Aruba.

Atrobe un delegacion di OCA a viaha pa e peninsula di Paraguana pa bishita y anima e caballistanan Venezolano individualmente pa nan re-activa. A laga nan tur hanya e sabor di e idea pa bin intercambionan competitivo entre Coro y Aruba. Cu e facilidad di ferry e proyecto aki tambe a bira un realidad exitoso cu hopi animacion entre caballistanan di ambos pais. Sea cu e competencia ta na Aruba of na Coro, e tabata atrae hopi turista.

E dos proyectonan aki a duna un spin pisa na e deporte di cabainan di paso tanto na Corsow, Coro y sigur na Aruba, pero e vision di OCA no a keda na e proyectonan ey so. Siguiyente OCA a visualisa cu paso fino merece un organisacion mundial y contrario na opinionnan internacional cu esey lo ta dificil, pa no bisa imposibel, OCA a mercadea e idea aki. Durante un competencia internacional na e Mundial di Barquisimeto na April 1989, den cual e caballistanan Donny Arends y Tom Pietersz a hiba cabai den avion pa competi, OCA a yega asina lew pa convence dirigentenan di Colombia, Corsow y Venezuela pa bin hunto pa forma un confederacion mundial. OCA a bende e idea suficientemente ferviente pa compromete e paisnan pa conhuntamente sigui traha riba e idea te ora cu yega e momento pa e paisnan topa un biaha mas, pero den un caracter mas official. A sigui un aña y mei di negociacion y preparacion te cu a yega na scohe e ciudad fronterizo di Cucuta pa e siguiente encuentro entre e 4 paisnan. Dia 27 di October 1990 despues di un dia di consulta final a keda firma e acta di constitucion di "La Confederacion Internacional de Criadores de Caballos Criollos de Paso Fino", abrevia "Confepaso". E acto ceremonial a tuma lugar den e historico y monumental cas di General Santander, "Villa del Rosario". Tom Pietersz, kende a representa OCA na e reunion di fundador a hanya tambe e poder di voto di Aspafico. Tambe presente na e acto historico aki tabata Dan Oduber y Ronny de Cuba, q.e.p.d.

Cu e acta di Confepaso den man a sigui un acercamiento pa hanya Puerto Rico, Republica Dominicana y Merca abordo. Den un gesto diplomatico a dicide di firma un siguiente acta di constitucion, pero e biaha aki cu e otro paisnan acerca. Esaki a tuma lugar na e ciudad di Ponce, Puerto Rico. Aki tambe a scohe un edificio historico y monumental pa tene e reunionnan. E paisnan a scohe Tom Pietersz, den compania di Lucho Claro den representacion di OCA pa habri y dirihi e prome reunion den su constelacion nobo, siendo e unico persona cu a keda di e grupo original di Cucuta. Ya na 1993 Confepaso por a organisa su Prome Mundial na e ciudad di Santo Domingo.

Den su transcurso di 33 aña OCA a conoce 6 president oficialmente elihí y nan ta Tom Pietersz, Camilo Muyale, Alex Mansur, Inca Boye, Juan Zuleta y Alex Cybul.

Den organisacion di competencianan OCA a conoce 3 piek. E prome biaha tabata e binimento di un DC-8 yen di cabainan di Criadero Lady Di. E segundo tabata e Mundialito y e tercer tabata e celebracion di 25 aña di OCA ora cu mas di 10 mil hende a bishita e feria di 3 dia. Aruba por ta orguyoso di e logronan local y internacional di su glorioso "Organizacion Caballista Arubano". Su serie di competencianan internacional "Interpaso", cu a inicia na 1986 a bira mundialmente conoci. Manera nos himno ta bisa . . . "chikito y simpel bo por ta pero si respeta".